

Florian

Im Tim si beschti Fründ das isch de Ivo,
und im Ivo si beschti Frönd das isch de Tim.
Und wenn die beide zäme sind, denn isch's für mich verby,
denn sie wänd immer eleige sy.

Gang hei, mir spiled lieber elei!
Gang hei, mir spiled lieber elei!

Am Mäntig goht de Ivo goge tschutte,
denn stoht de Tim veruss vor minre Tür.

Allerliebschte Florian, spilsch mit mir chli Ysebahn?
Oder nehmsch d'Chryde uf d'Stross,
denn zeichned mir zäme es grosses Schloss!

Doch es goht nid lang, denn chund er z'flitze
und brämsed mit em Kiki grad näb üs.
Und wenn die beide zäme sind, denn isch's för mich verby,
denn sie wänd immer eleige sy.

Gang hei, mir spiled lieber elei!
Gang hei, mer spiled lieber elei!

En Fründ, das fählt mir sehr.
En Fründ, das wönsch ich mir.

Ich würd mit ihm en Hütte baue, hinderem Huus de Bach staue,
chlättere mit em Pyjama, z'oberst uf de Baum.
Mer chönnted zäme Musig lose, tuusched üsi Trainerhose,
fahret mit de Seifichichte einisch rund um d'Wält.

So ne Fründ fählt mir sehr.
So ne Fründ wünsch ich mir.

Irgendwann wird ich ne ha.
Chasch ne si, wenn't wotsch, lüüt mer a!